

vnd solches so oft wiederholen/ bis der spiritus vini nichts mehr extrahiren wil / denn sol man die solutiones zusammen gießen / vnd den spiritum in balneo lind davon destilliren / bis auff den dritten Theil / so hat man ein hübsches Extractum aus dem Fleisch vnd Blute.

NOTA.

In dem Menschen Fleisch / oder wahrhafftigen Mumia ist eine gewaltige Arzney verborgen / denn es ist gleichsam eine Panacea fast in allen Krankheiten zu gebrauchen / vnd ist ein solches Antidotum, dergleichen kaum zu finden ist / wie hernach sol angezeigt werden.

Unser Author setzt allhier zweyerley Modos die essentiam oder tincturam universalem microcosmi zu erlangen / seynd alle beyde gut / vnd gar wol zu imitiren oder nach zu machen: Aber man hat noch etliche bessere Hand / Grieffe / damit die wahrhafftige Essentia ausgezogen wird. Crollius hat auch einen feinen Modum, welcher in seiner Basilica nach zu schlagen vnd zu finden ist.

Processus no-
ster.

Ich habe vor drey Jahren die Mumiam also zugerichtet: Ich nehme das Menschen-Fleisch von einem gesunden Menschen / der entweder mit dem Rade oder Schwert gerichtet worden / schneide dasselbe fein dünne / vnd bestreue es mit gestossener Myrrhen vnd Aloen / vnd lasse es also an der Luft damit gar wol trucknen / alsdenn thue ichs in ein Glas / giesse einen guten spiritum Salis darüber / doch mehr nicht / als daß es nur damit angefeuchtet werde.

Wenn dieser nun ganz vnd gar hinein gekrochen / so giesse ich noch mehr daran / vnd lasse es wol damit maceriren, lasse es also an der Luft stehen / vnd lasse es wieder trucken werden / doch muß es oft vmbgewendet werden / sonst wird es bald schimmlicht.

Wenn nun alles trucken vnd dörre worden / so mache ichs zu einem Pulver / vnd giesse einen guten spiritum vini darüber / mache das Glas zu / vnd lasse in gelinder Wärme seine tincturam extrahiren, den gefärbten spiritum giesse ich herunter / vnd giesse einen frischen wieder darüber. Wenn man aber einen spiritum aus den Wacholderbeeren haben kan / ist es desto besser.

Wenn sich nun nichts mehr färben wil / so thue ich die gesammelten